



Sabtu, 20 Agustus 2022
Ogen: 1 Timotius 4:15-16



Cidahken Kemajunndu



Ijuma Nd. Unjuk lit pokok alpukat. Tapi nggo 2 tahun suanna lalap la gedang-gedang, janah la idah perkembangenna. I bas ingan sideban, lit piga-piga pokok Alpukat si radu isuanken nggo gedang janah tempa-tempa enggo nandangi reh bungana. Adi kam jadi Nd. Unjuk ndai, uga nge banndu pokok alpukat ndai? Banci saja mis si ruah gelah ganti bibit si mabru. Payo nge, adi la lit perkembangenna tentu perlu iganti. Penting kepe teridah perkembangan i bas kai-kai pe, gelah ula kari kita la atan amin pe nggo ndekah erjuang.

Persinget rasul Paulus man Timotius, i bas ia melayani i Efesus. Mbue memang tantangan i je, godan-godan duniawi, bage pe sura-sura si enterem kerna diri sekalak serayan, si megati lanai Alkitabiah. I bas si e, itegasken Paulus gelah Timotius ula terbaba arus. Ia arus berintegritas, ola mudah ibabai pengajaren si la tuhu. Ola sekalak pe mapas bana erkiteken kiningudanna, tapi erkiteken kinitekenna ras hikmatna, lagu langkahna pe erbahanca ia tetap iergai. Uga cara ncidahkan kemajun e, nina Paulus ula ragu-ragu ncidahkan pemeteh ras makeken talenta. Percaya diri ras andalkan Tuhan i bas makeken talenta e, pasti talentata e ipasu-pasu Tuhan reh sikapna. *Jagai dirindu ras jagai pengajarenndu*, ertina arus lit ia penguasan diri i bas Timotius. Doni enda mbelangsa adi ateta sikuasai. Kalak si atena naluken doni, perlebe nggo ngasup ia naluken dirina jine. Ola bahan kai pe erpalasken kerangapen, sada dalan guna nguasai dirinta. Jagai pengajaren, ertina kita leben erlajar maka si ajari kalak. Kalak si tetap erlajar kap kalak si pentar. Tapi kalak si beluh akapna bana, em kalak si motuna. Doni enda berkembang tep-tep menit, ola si akap si angka kerina, sabap bage si akap kita beluh, jem situhuna kita mulai bodoh. Page si isin renduk ia, tapi sesa jurgak amin la lit isina.